

共同經課 - 1

撒母耳記下一章一節，十七節~二十七節

1 掃羅死了，也大衛thài死A-má-lèk人tò來ê時，大衛toà tī Sé-kek-láh兩日。17 大衛做哀歌，追悼掃羅kap伊ê kiáⁿ約拿單。18 Koh講，將chit-ê 哀歌教示猶大人；chit-ê哀歌名叫弓歌，寫tī Ngá-soah-jīⁿ 冊。歌講，19 以色列ah，你ê榮顯ê受thài tī山頭； 害ah，英雄ê死到án-ni ah！20 莫得tī Ka-tèk報告，莫得tī A-sit-ki-lùn ê街路報揚，驚了腓利士ê cha-bó-gín-ná歡喜。驚了無受割禮ê人ê cha-bó-gín-ná大悅。21 Ki-lī-phoⁿlah，願無露水，無雨，tī你hia，也無出禮物ê田； 因為tī-hia勇士ê藤牌受hiat-kák，掃羅ê藤牌，親像無受抹油ê。22 Tùi受thài-ê ê血，tùi勇士ê油，約拿單ê弓無倒退，掃羅ê刀無空空tò-tng。23 掃羅kap約拿單活ê時thang疼，thang歡喜ê； 死ê時也無分離； In比鷹鳥khah緊，比獅khah強。24 以色列ê cha-bó-kiáⁿ ah，tiòh為tiòh掃羅啼哭，伊bat hō lín穿朱紅色來歡喜； Hō lín ê衣服有黃金ê裝飾。25 勇士怎樣倒tī戰陣！約拿單受thài tī你ê山頭。26 我ê兄約拿單ah，我為你傷心； 我盡在歡喜你； 你ê疼我真奇妙，贏過婦人人ê疼。27 勇士死到án-ni，戰器毀滅到án-ni！

共同經課 - 2

詩篇一百三十篇

1 上崎á ê詩。1) 耶和華ah，我tùi深淵求叫你，2 主ah，求你聽我ê聲； 願你àⁿ耳孔聽我懇求ê聲。3 主耶和華ah，你若究勘罪惡， Chī-chūi khiā-oē-tiâu？4 總是你有赦免ê恩， Beh hō 人敬畏你。5 我thèng候耶和華，我ê心神teh thèng候； Tī伊ê話我有ng望。6 我ê心神thèng候主，比守更ê人thèng候天光khah切，比守更ê人thèng候天光khah切。7 以色列ah，你tiòh ng望耶和華； 因為tī耶和華有慈愛， Tī伊有豐盛ê救贖。8 伊的確救贖以色列，脫離伊一切ê罪惡。

共同經課 - 3

哥林多後書八章七節~十五節

7 Taⁿ lín tī凡事，親像信心、口才、知識，lóng總ê熱心，以及lín ê疼阮，chiah-ê事既然充滿，就tī chit-ê恩惠也tiòh充滿。8 我講án-ni，m̄是命令lín；是tùi別人ê慇勤來試驗lín仁愛ê實在。9 因為lín知咱ê主耶穌基督ê恩；伊本好額，為tiòh lín成做sòng-hiong，beh hō lín tùi伊ê sòng-hiong來成做好額。10 我tī chit層事將我ê意見hō lín知；因為這是lín ê利益；是lín tùi舊年已經提倡chit-ê事，m̄-nā做前行，也做前甘願。11 Taⁿ tiòh做成chit-ê事；致到lín既然有熱心ê甘願，也照所有ê來成伊。12 因為已經有chit號熱心，就得tiòh接納，是照人所有ê，m̄是照人所無ê。13 卻m̄是ài別人liâu-lēng，lín 乏tát，是ài得平平；14 現時將lín有chhun ê補in ê無夠，thang將in有chhun ê補lín ê無夠，án-ni chiah會平；15 照所記載講，拾choē ê無chhun，拾少ê無欠。

共同經課 - 4

馬可福音五章二十一節~四十三節

21 耶穌坐船 koh 過去 hit pēng，kui 大陣 ê 人聚集就近伊；hit 時耶穌 tī 海邊。22 有一個管會堂 ê，名做 Gái-ló來，已經看見耶穌，就仆 tī 伊 ê 腳下，23 切切求伊講，我細漢 ê cha-bó-kiáⁿ 差不多 beh 死；請你來用手 hoāⁿ 伊，hō伊得 tiòh 救來活。24 耶穌 kap 伊去，kui 大陣 ê 人 tè 伊，真 oe-khoeh。25 有一個婦人人，血漏十二年，26 bat tùi choē-choē ê 醫生受 tiòh choē-choē 艱苦，koh 一盡破費伊所有 ê，但是無一絲 á 利益，反 tng ná 傷重，27 聽見耶穌 ê 事，就來 tī 眾人中，tùi 伊 ê 後面來摸伊 ê 衫，28 因為講，我 kan-ta 摸伊 ê 衫，就會好。29 Tùi án-ni 血漏 liām-piⁿ 止，本身知伊 ê 病痛已經好。30 耶穌即時家已知有權能 tùi 伊出，就 oát-tng 身，tī 眾人中講，Chī-chūi 摸我 ê 衫？31 伊 ê 學生 kā 伊講，你看見 kui 陣人 teh oe-khoeh 你，iáu-kú 問，Chī-chūi 有摸我？32 耶穌遍遍看，ài 看做 chit-ê 事 ê 婦人人。33 婦人人知本身所歷過，驚惶 ngiauh-ngiauh-chhoah，就來仆 tī 伊 ê 面前，lóng 照實 kā 伊講。34 伊就 kā 伊講，婦人人 ah，你 ê 信已經救你；thang 安然 tò 去，你 ê 病全然好。35 Teh 講 ê 時，有 tùi 管會堂 ê 家來講，你 ê cha-bó-kiáⁿ 死 lah；mih-sái iáu teh 勞煩先生？36 耶穌邊 á 聽見所講 ê 話，kā 趕會堂 ê 講，莫得驚，只有 tiòh 信。37 耶穌 tī 彼得、雅各 kap 雅各 ê 兄弟約翰以外，m̄准別人 tè 伊 saⁿ-kap 去。38 到管會堂 ê 家，看見有 hoā-hoā 哮，也有啼哭大聲哮 ê 人。39 已經入去就 kā in 講，Lín 啥事 hoā-hoā 哮 teh 啼哭 ah？Gín-ná m̄是死，是 teh 暈 nā-tiāⁿ。40 In 就恥笑伊。但是伊趕 in 眾人出去，就 chhoā gín-ná ê 父母以及 kap 伊來 ê 人，入 gín-ná 所 toà ê 所在；41 就牽 gín-ná ê 手 kā 伊講，Tāi-lī-tāi-kó-bí，翻譯就是講，Cha-bó gín-ná，我命令你，起來。42 Cha-bó gín-ná liām-piⁿ 起來行；因為伊十二歲 lah。眾人就大 gōng-ngiáh 奇怪。43 耶穌嚴嚴禁戒 in 莫得 hō 人知；就吩咐 tiòh hō cha-bó gín-ná 食。